

POVR *Me* G V I L L A V M E D E  
Maures Aduocat au Parlement de Bourdeaux, legiti-  
me administrateur des biens, & actions de Jehan  
Vincent de Maures son fils: Et Damoiselle Clemence de  
Grauier authorisee au refus dudit de Maures son mary,  
heritiers testamentaires de la dame de Frespech, deman-  
deurs en complainte & autres fins.

Contre Messire François de Montferrand sieur de Cancon,  
le sieur Viscomte de Fontcaude son fils, & damoiselles  
Bertrande & Esther Deschelles, defendeurs.



A Dame de Frespech veufue du feu sieur  
de Montferrand premier Baron de Guyē-  
ne, ayāt nourry & esleué dès sa plus tendre  
enfance ladite de Grauier, qu'elle a tou-  
siours chérie & affectionnée, comme sa  
propre fille adoptiue, apres l'auoir mariee  
audit de Maures dès l'an 98. & receu d'eux  
toute l'assistance, deuoir & respect, que  
meritoit l'honneur da sa bienueillance;

Institua ladite Grauier & Maures son fils ses heritiers ez biens  
qu'elle possedoit au pays d'Agenois seulement, qui n'estoient  
que meubles, ou droicts mobiliars & acquests, par son Testa-  
ment solennel, & assisté de toutes les formes & solemnitez re-  
quises pour sa validité, en datte du 16. Septembre 1607.

Il est certain par la maxime generale du droit François, que  
les heritiers testamentaires sont aussi bien saisis, comme ceux  
*ab intestat*, sans qu'il leur soit besoing d'aucune adition d'heredi-  
té, crétion ny autre solemnité du droit Romain, & y en a ar-  
ticle expres en la Coustume de Guyenne & pays Bourdelois cō-  
ceeu en ces termes, Item le mort saisit le vis par quelque maniere qu'il  
succede, par testament ou sans testament: Et celuy qui succede incontinent  
apres le deces de celuy, à qui il succede, est en la possession, en laquelle estoit le

A





*trespassé au temps de son decés: tellement qu'il pourra intenter tout remede possessoire.*

C'est pourquoy, les demandeurs ayans trouué que le sieur de Cancon & ses fils, personnes du tout estrangeres, & qui ne touchoient d'aucune parenté la defuncte testatrice, s'estoient tant par force & violence ouuerte, que par l'entremise de Jehan Rigou Notaire, emparez du Chasteau & terre de Frespech, meubles pretieux, armes, bleds, vins, bestiaux & autres choses, qui y estoient, & en vn mot de toute l'heredité; Ils formerent leur complainte pardéuant le Seneschal d'Agenoys, ou apres les recusations de tous les Iuges & aduocats, iusques au nombre de cinquante à soixante, Finalement ledit sieur de Cancon & son fils auroient interietté autant d'appellations, qu'il se seroit rendu d'appointements en la cause, de maniere qu'il a esté impossible aux demandeurs d'y auoir aucune Iustice.

La cause deuolue par appel au Parlement de Bourdeaux, le sieur de Cancon preuoyant que sa violente inuasion destituee de toute apparence & pretexte seroit de mauuaise odeur; Il pratique & mendie l'interuention desdites Bertrande & Esther Deschelles sœurs de ladite defuncte testatrice, qui se preualent par son decés de plusieurs terres & grands biens, qu'elle possedoit au Blaizois & pays Chartrain, & ayât achepté leurs droicts à ses perils & fortunes, moyennant vne somme de neant, il les fait interuenir par requeste du douziesme Ianuier 1608. & puis soubz leur nom demande par autre requeste, que defenses soyent faictes aux debiteurs hereditaires de payer ce qu'ils doibuent: De maniere qu'il s'est fait faire defenses à luy mesme de payer vne somme de Trente mil liures & plus, dõt il est redeuable par obligation enuers l'heredité.

Cen'est pas tout, car pour faire quitter aux demandeurs la partie, comme on dit, par l'apprehension de la peine & de ladespense, & en tout cas esloigner le payement de ce qu'il doit, il poursuit vne interdiction des Parlements de Bordeaux & Tolose, & finalement vne euocation & renuoy au Conseil, où la cause retenue & reiglee, il n'y a sorte de fuittes & d'artifices qu'il n'ait mis en œuvre pour trauffer le iugement de la cause, iusques à obtenir des lettres en forme d'examen à futur, depuis





la contestation & reglement, pour donner quelque ombrage & vitieuse impression du testament, par lequel les demandeurs ont esté instituez heritiers.

Aujourd'hui doncq le procesz ayant pris ses formes malgré les traueses du sieur de Cancon, il est question de iuger, si le testament est bon & valable, ou non, car de là depend le iugement de tout le reste.

Orque le testament soit bon & valable, solennel & assisté de toutes les formes requises par la disposition de droit *in l. hac Consultissima, & l. in testamentis. de testament.* la seule lecture en fera foy. Consequemment il est vray de dire qu'il doit sortir effect, & que, les demandeurs estans heritiers es biens du pays d'Angenois, lesdites Deschelles sœurs ny peuuent rien pretendre, pource que *Quandiu potest ex testamento adiri hereditas, ab intestato non defertur l. quandiu D. de adquir. vel omit.*

D'ailleurs lesdites Deschelles ayans fait cession & transport au sieur de Cancon de toutes leurs pretentions à ses perils & fortune, sans aucune promesse de garantie, ny restitution de deniers, elles ne sont plus receuables a disputer ledit testament ni pretendre la succession de leur sœur *ab intestat*, puis qu'elle a testé.

Des freres & sœurs, cōme sōt lesdittes Deschelles de la defuncte Testatrice *non admittuntur ad inofficiosi querelam, nisi turpi persona scripta herede. l. fratris vel sororis. & l. fratres. C. De inoff. testi.* Ceste tache ne se rencontre point es personnes des demâdeurs, enuers qui la defuncte testatrice n'a esté portee d'affection, que pour leur honnesteré.

Et quant au sieur de Cancon & ses enfans, ce sont personnes du tout estrangeres, & qui n'ont autre droit d'impugner le testament, ou quereller l'heredité que leur propre conuoitise & violence, qui les rend non receuables.

On à voulu donner plusieurs atteintes & coups de bec contre le testament: mais il se defend de luy mesme, puis qu'il subsiste sans estre attaqué d'aucune inscription de faulx: & partant tous les faicts de suggestion & autre suspicion inutiles & vains. *Testes cum de fide tabularum nihil dicitur, aduersus scripturam interrogari non possunt. Paul. recept. senten. lib. 5. tit. 15.*



4

Si Maures eust tenu la volōté de la testatrice captiue, & en sō pouuoir, il n'auroit attēdu à la faire disposer au dernier iour de sa vie, ains se seroit assēuré de bonne heure: Mesmes luy ayant ladite Dame fait l'honneur de se retirer & loger en sa maison, dans la ville d'Agen, plus de trois ans auant son decez, il se seroit assēuré de meilleure heure. Et si le testament eust esté dressé par luy, ou suggeré, il se seroit bien gardé d'y faire comprendre tant de legataires qu'il y a, iusques au nombre de xix. dont les legs avec les debtes reuiennent à plus de sept mille escus.

On a aussi voulu tirer Maures en enuie pour sa qualité d'Ad-uocat, comme si elle empeschoit & rendoit nulle l'institution, dont sa femme & son fils ont esté honorez par la defuncte Testatrice: Mais outre qu'il ne se trouuera point qu'il eut oncques postulé pour ladite Dame, ny eu la direction des ses affaires, ayant l'honneur d'estre employé en autres charges publiques, qui l'ont tout à fait distrait de l'exercice du barreau: Il fait à noter que ladite Dame n'auoit point de proces, & que son affection enuers les demandeurs auoit commencé long temps au parauant que Maures fut cogneu d'elle, aiant, comme dit est, nourry & esleué ladite Grauiet dez son enfance, ne plus ne moins que si c'eust esté sa propre fille.

Il s'en suit donc que les demandeurs heritiers testamentaires par vn bon & valable testament, estans saisis par la Coustume generale de France, & se voyant troublez & deiettez de la iouissance des choses hereditaires par la force & violence du sieur de Cancon, ont à bonne & iuste cause formé leur complainte contre luy & son fils, qui les troublent, & ne leur ont iusques icy laissé que la qualité toute nūe, & le vain nom d'heritier, *Regulariter definiendum est (dit Vlpian) eum demum teneri petitione hereditatis, qui vel ius pro herede, vel pro possessore possidet vel rem hereditariam, licet minimam.*

Le Conseil verra que le sieur de Cancon demeure d'accord de s'estre emparé de son auctorité priuée du Chasteau & terre de Frespech, & n'en apporte autre pretexte que certaine transaction du 21. Mars 1594. Mais il est iustificié au proces, que quand ceste transaction subsisteroit, elle ne luy peut donner que de



5

douze onces les trois en la totalité de ladite terre & seigneurie de Frespech: d'autant qu'il n'y estoit question que de l'heredité de Gedeon de Montferrad auquel appartenoiét de son chef, & pour sa legitime, deux onces en ladite terre, Et vne once à cause de la succession d'Isabeau de Montferrand sa sœur. Les transactions ont leurs effets bornez par la circumference de ce qui s'y traicte. *Non extenduntur ad ea, de quibus non fuit cogitatum. vulg. l. si de certa. C. De Transact.* Et puis sous couleur de ladite trāsaction il ne peut rien pretendre aux bastiments & acquests depuis faicts en ladite terre, ny aux meubles precieux, armes, grains, vins, bestiaux, & autres biens, qui estoient dans ledit Chasteau, & dont toutesfois il s'est emparé, & les detient par force & violence.

Il a voulu dire que pour raison d'iceux les demandeurs ont mal formé leur complainte: Mais la response est prompte, qu'il s'agit d'vniuersité de meubles, pour laquelle la Complainte a lieu selon nostre vsage. Car bien qu'en France complainte n'ait lieu pour chose mobiliere seule, Toutesfois nos Iuriscultes & Pradiciens François tiennent, Que quand le meuble vient en consequence de l'immeuble par vn droict & moyen, comme d'vne maison, en laquelle sont meubles, ou en cas de succession, en ce cas la complainte a lieu. La Coustume de Poictou art. ccc i. de Sens art. cxvi. de Bourbonnois article xci. d'Orleans art. cccclxxxix. & la disposition de droict in l. i. §. *planè. & l. 3. §. consequenter. D. de vi & vi. arm. nempe si rei soli accedant res mobiles.* Les demandeurs sont en ces termes, estans troublez en la possession & iouissance de l'vniuersité de tous les meubles de ladite deffuncte estans en sa maison & Chasteau de Frespech. C'est pourquoy le trouble estant bien iustificié, ils doiuent estre maintenus & gardez au droict de ladite heredité, fruiçts profits & emoluments d'icelle, avec despens, dommages & intersts, A quoy ils concluent, estans fondez en vn bon testament, la plus fauorable de toutes les dispositions humaines.

*Monsieur de Remefort sieur de la Grilliere, Rapporteur.*

MONSIEGOT.





ТОБЯКОМ







